



**Al stan a la Higa: Collavurats da la Lia Rumantscha en discurs cun giasts.**

MAD

# Ils Rumantschs ston sa registrar

L'exposiziun speziala «Rumantsch» da la Lia Rumantscha a la Higa

■ **(Ir) Dals 24 fin ils 31 da matg 2014 han var 6000 personas visità il stan da la LR a la Higa 2014. En spezial l'appel als Rumantschs da sa registrar il 2015 ha procurà per discussiuns.** «Tut las Rumantschas e tut ils Rumantschs da l'entir mund èn obligads da vegnir en Chasa Rumantscha per sa laschar registrar – e quai ils 15-05-2015 a las 15.15.» Ina da numerusas parolas che ornavan las parais dal stan da la LR a la Higa. Cler che l'in u l'auter ha chapì quai sco sgnocca... Tuttina sa tschenta la dumonda co ch'igl è pussaivel da promover il rumantsch senza enconuscher exactamain il dumber da pledadras e pledaders. E co che la comunicaziun cun quels duaja funcziunar, uscheditg ch'i n'è betg cler

tgi che tutga insumma tar ils Rumantschs.

## Era far il chillen è rumantsch

Da las var 6000 personas che han visità il stan da la LR n'eran betg tuts Rumantschs. Ma tuts fan di per di las medemas experientschas: linguas èn dinamicas e sutta-postas ad ina midada permanenta. Ellas sa servan tar ils vischins, perquai che las mancan ils dretgs plects u perquai ch'ils plects esters tunan simplmain bler pli cool: «Jo voll, far il chillen ina runda sil fauteuil e beiber in ei easy.» Era questa parola figurava sin ina da las parais dal stan da la LR. Sco era quella che constatescha ch'ils Chinois avessan stuì gudagnar 112 000 medaglias als

giuus olimpics d'enviern a Sotchi per esser tuttina buns sco ils sportists rumantschs.

## Il rumantsch influenzescha il PNB a moda positiva

Ils Rumantschs èn plurilingus. La plurilinguitad è ina funtauna da la ritgezza culturala era gia enconuscent. Perscrutaders da l'Universitad da Geneva han observà che la plurilinguitad ha er effects positivs per l'economia. Ella auza las entradas mintg'onn per 46 milliardas francs, quai correspunda a 9 perentschient dal product nazional brut (PNB).

Damai: A revair a la Higa ils 15 da matg 2015.